

The background of the entire image is a solid red color. It is populated with numerous black and white stylized human figures in various poses and activities, representing different professions and social roles. Some figures are sitting at desks, some are standing, some are carrying items, and some are in dynamic poses. The figures are arranged in a grid-like pattern, filling the space around the central text.

# JOSE LUIS OTAMENDI

kapital  
publikoa

# **Kapital publikoa**

**JOSE LUIS OTAMENDI**

 **Susa** poesia

Liburu honen salneurria: 3 € + BEZ.

Ordainketa egiteko, edo liburu gehiago eskuratzeko:

<http://susa-literatura.com/ebook>

© 2014 Jose Luis Otamendi

© edizio honena: Susa

cc-by-sa Creative Commons Aitortu Partekatu

<http://creativecommons.org/licenses/by-sa/3.0/deed.eu>

Lehen edizioa paperean: 2014ko azaroa

Edizio hau: 2014ko azaroa

Susa: 317 posta kutxa / 20800 Zarautz

Adoain Aita 92 / 31015 Iruñea

Zubitalde 21 / 48195 Larrabetzu

Telefona: 943 83 26 55

Elektroposta: [susalit@armiarma.com](mailto:susalit@armiarma.com)

Webgunea: <http://susa-literatura.com>

**BAKE HOTZA**

---

# MEMORIA

Memoria zer den ez dakit  
sikiera gorputz atala edo gaixotasuna balitz  
agian asmatuko nuke deskribatzen  
ezaugarriak sintomak neurriak  
lot balekioke urtaro edo sasoi bati  
epe mugaren bat jarriko nioke  
baina memoriak  
uste dut lekukoak etsaiak  
lagunak eskatzen dituela  
elkar hartzea  
bat etortzea nolabait...  
nago memoria dela  
nahitaez bihotzerreaz irensteko zerbait

ez nuke neuretzako nahi  
memoriaren amil-izura kondenatutako herririk...  
ni noan herrian  
gauzak berez konplikatzen dira  
nahigabe bezala  
ez dago enkontru errazik  
festa arinik ez da

hitz larria sobera eta igurtzi gutxi  
lana suelta banatzen da baina ez irabazirik

ni noan herrian  
erruz galdu da denbora  
eta urte galduen jarioa ez du atertu oraindik:  
makurra izan den denbora  
bihur ote liteke denbora oparoa  
eta hautsitako denbora bat inoiz berregin...  
etortzekoa den aldi berri hori  
iritsiko dela berma dezake inork  
eta ziurtatu denok aurkituko gaituela onik

galtzailerik gabeko herri bat  
gauza konplikatua da  
eta irabazlerik gabekoak  
are konplikatuago dirudi  
ni noan herrian bere denboraren xerka  
dabil jendea  
eta denbora horrek beharko ditu atariak  
kaleak fabrikak...  
eta denboratik kanpora ezin da inor laga  
denbora eta bere zuloak  
denbora eta bere leihoak

denboratik kanpo ezin da inor laga  
bihotzak orduan jarri eta kontaktari lotu  
eta konta ahala konta  
behar beste bider hasi berriz

memoria zer den ez dakit  
baina gauza konplikatua dela segurua  
memoria zer den xuxen ez dakit  
memoria oroitzea baino gehiago da  
memoria ez da orri zuri bat  
ez da mendi elurtua etorkin abandonatuen  
oin arrastoen esperoan  
uste dut memoria akordatzea dela  
eta ados jartzea ere bai  
akordatuko al gara gertatu direnekin  
akordatuko al gara gertatzen ari direnekin  
akordatuko al gara gertatzeko daudenekin...  
eta akordatzez gero  
ehuneko zenbatean  
eta zeinekin...

memoria akordatzea bada  
ni herrira noa  
baina badiot beldurra

hainbat hitzorduri  
hainbat ispiluren islari  
hainbat ispilu isili...  
memoria akordatzea bada  
memoria iratzartzea da  
baina ez dakigu  
ez non ez noiz ez nola oraindik  
memoria akordatzea da  
baina noizbait esnatuko al gara  
eta nora esnatu  
eta norekin...

beldurra diot memoriaren epaiari:  
eta ezartzen digun kondena  
berriro inon ez den herri bat osatzea balitz  
nola egingo dugu  
zein bidetatik...



---

# ATLANTIKOAREN AURREAN

Nik diot

orogenesisia eta fotosintesia  
baino garrantzitsuago dela  
zure hagineko mina

nik diot

ez daukadala eskubiderik neuretzat  
edozein pertsonari dagokiona baino eskatzeko  
nik diot

inoren izena zaintzeko egin dezakedan guztia  
egiten ez badut

txango ustela izango dela mundualdi hau  
baga bat zerbait hobearen esperantza higitzen  
porrot unibertsalaren uhinetan

nik diot

usainak zauriak pentsamenduak  
lekukoak direla inportanteak  
inorekin zer banatua izateko

zerbait kontatzeko ulu gertuegien itzalpeko gauetan  
nik diot

maitasunak duela munta behinena

mende erdi joan zaidala birundaka hori zer den  
ikasten  
nik diot  
sentimendu kontrajarrien desordena honetan  
gertaeren norabide eta larderia orokorraren  
aitzinean  
gogaideak egin edo asmatu eta  
amore ez ematea dela funtsezkoena  
ez amiltzea konstelazioen isiltasunaren azpian  
herioren zemai handinahiak entzuten  
minutu bat ez galtzea  
nik diot  
jainko ez izatearen bakardadea  
eramangaitza bezain ederra dela  
nik diot  
zure ezpainen ukitu batengatik nagoela hemen  
ez dakit zenbat milioi jenderen artean  
nik diot  
ez garela kukuak geure izena soilik kantatzeko

---

# ASKO IZAN

arnasten dudan airea nola berritzen da:  
etxe-usoena eta gabiraiena da  
behiala aita zenak biriketan  
iragazitako berbera da  
eta hartu eta bota egiten dut ohartzeke  
minutuko 12 bat bider  
orduko 720 aldiz  
eguneko  
urteko hainbeste alditan

badakigu arnasa hartze hutsez  
geure burua ari garela hiltzen  
anoa txikitan...  
nik ere inori osten diot bere arnasatik  
sartu-atera nabil inoren bizitzan  
nik hartutakoarekin  
besteri kentzen diot  
bizitzeko dagoen denboraren guztizko zakutik

hau ez da egun bat  
hau koipe orbana da

antzerik gabeko denboraren mapan  
hau ez da sukalde soila  
zotin itoa baizik izarren lo-eroan  
eta alditan gora dator ezina  
batzuetan denontzat ez dago agindutako herririk  
batzuetan iratzarri egiten dira txakurrak  
oinetakoak eskuan sartu arren etxera:  
ekina ezinez desegina  
—edozein orri barreni data jartzea  
ez da garaiko izateko bermea—

bakarrik egotea  
zu zeu ere gabe geratze hori izango da  
bost segundo bost minutu inor gabe  
eta arrotza zaizun arnasaren mende  
—frogatua dago  
ezeren jabe ez dena ere desjabe daiteke—  
mahai gainean mugitzen diren  
animalia izuak ditut eskuak  
gorputzak esan nahi ez didana asmatzera  
jartzen naiz sarri:  
haren apetak haren ajeak  
neurekin daramat toki guztietara  
baina oin batek ihes egin dit hozkailu azpira

arnasaren jitoan osasuntsu nago  
neure sasoiaren seme izan beharrez ordea  
batzuetan gizon zatikatua naizela uste dut  
tesela galduetikiko mosaiko eragabea:  
eta arnasten dudan airea nola berritzen da

---

# EURIA

Gaur euri txikia egingo duela  
esan zuten atzo

hala ere balizko aukeren tankera hartu nahi diot  
egunari

zer dakarren baieztatu neure begiz  
azken orduko iragarpenak entzun aurretik

gaur bero zakarra egingo du istripua egingo du  
ahazmena egingo du eta gose lanbroa egingo du  
gaur isiltasun lapatxa egingo du  
samin bisutsa eta maitasun jasak egingo ditu

gaur arropa maiztua egingo du  
gaur kontratu eteteak eta arbuioa egingo ditu  
gaur errepide luzeak balak eta debekuak egingo ditu

gaur hotz hezea egingo du  
bota ahalean egunkari malutak eta  
izerdi palastak egingo ditu beldurra egingo du  
gaur jendea zarra-zarra egingo du

eta leihotik ikusten dudanez  
euria ere ari du

---

# GERRA TXIKIA

XXI. mendeko biztanle ondo-bizia naiz  
gaurdaino ezein biktimismotan jausteko  
arrazoirik izan ez dudana  
eta ongi dakit munduaren azalean  
pikor koskorra izatera baino ez garela helduko inoiz  
hala ere apur bat harritu egiten nau ikusteak  
nola erretiratu diren nazioarteko begiraleak oro  
aditu eta bakegileek nola utzi gaituzten  
geure indar txikiko gerran egosten:  
jendea handizka daramate preso  
legez ezarritako iritzi isolatze edo amodioak  
naturaren epaitzat onartuz  
eta berriro hor dira hildakoak

eragozpenik ez dut aurrera egiteko egunerokoan:  
gogora datozkit nire zorionaren errutinak  
sortzen dituen albo kalteak bazterketa miseriak  
baina ez nago maite dudana ukatzeko  
torturapean ez bada  
edo akitu egin delako maitasuna...  
eta berriro hor dira hildakoak



uste dut hori guztia etor daitekeela  
XXI. mendeko biztanle ondo-bizia naizelako:  
gaizkileen adiskide jo nazaketela  
eta kalte larrien eragiletzat  
hartuko nauenik ere ez da faltako  
—hainbeste dira aurrekariak—  
hala espetxera daramate jendea  
eta berriro hor dira hildakoak

keinu eroekin espantuka  
gerra honen luxuzko ertz batetik eskatzen ditut  
nazioarteko begiraleak kazetariak kamerak  
behin eta berriz ez dezagun gure burua kondenatu  
geure buruaz erditzera  
munduaren aspergarri

eta batzuetan  
anonimotasun zoragarrian murgildutako  
herri libre baten ametsak iratzartzen nau oraindik  
—handizka zapaldutako  
intentsitate txikiko nire aberrian—  
eta betiko hor dira hildakoak

---

# OHEA JANTZI

**b**azterrean utzitako gehienek  
pentsatuko zuten agian  
mundua ez zela akituko euren saminarekin  
borrokan hildakoek umezurtzek alargunek  
herri eta lantegi hustuek  
pentsatuko zuten segida izango zutela egunek  
eta biharamunak ekarriko zituela garaileak  
egunkaria besapean

denok pentsatzen dugu hemen jokutzen denak  
izango duela gero modu bat askorentzat  
eta horregatik grina itsu hori:  
ez baitago zoriaren esku uzterik  
eguzkiaren argitasuna edo etxeko ogia

mundu hau gaiztoa da ezin dutenekin  
lurra norena den galdetzeak arinkeria lizuna dirudi  
aise konprenitzen da orain  
hil osteko bizitza baten mehatxuak  
izututa bizi direnen larria

denok pentsatzen dugu beti dela beranduegi  
gauza gehiegi gertatzen direla denak batera  
baina geuk ekin ezean  
berriro besteren gain lagako dugula  
menderik mende dastatu gabe  
galtzen utzitakoa jasotzeko lana  
eta ez dago zoriaren esku uzterik  
lotsa neurri baten aukera

koltxoiei buelta eman eta  
negurako prestatuko gara:  
aurki hasiko du berriz ohe barruan elurra

---

# GAITZESPENAK

Gaitzesten ditut trafiko ezbeharrez  
gertatzen diren heriotzak  
eta gainerako kalteak  
eragileak babesleak  
eta euren isiltasunarekin  
nolabaiteko aterpea ematen dietenak

lanean gertatzen diren  
heriotza guztiak gaitzesten ditut  
eta zauritu zein ezinduak  
eta makur horien gibelean  
dauden helburuekin bat egiten dutenak:  
okerron sustatzaile intelektualak

gaitzesten ditut genero indarkeriak  
gaixotasunak gorrotoak  
miseriak eta abandonuak  
galtzera uzten dituen biziak

gaitzesten ditut luiziek erauntsiek  
uholdeek eta naufragioek

lurrikarek eta gerrek eragindako hilketak  
fatalitate ater ezinean itsasoak jaten dituen  
etorkinak

denak gaitzesten ditut tinkotasun sendoenaz

baina gezur zuriz eta karitatez  
gizentzen direnez nahigabeak  
gaitzesten ditut gaitzespen hitzak ere  
gaitzespenok

geure arima izun eta aratzarekin  
istripuen ardura ezaren eta  
hilketen hegalpean bizitzea errazten digutelako

gaitzesten ditut gaitzespena beste indarrik  
ez dakarten arrazoiak

gaitzesten ditut gaitzespena beste urratsik  
eskaintzen ez duten bideak

beti haizearen alde ñabardura gabe  
fedeari edo gehiengoz onartu iritziari  
makurtzen zaizkion gogoak  
denak gaitzesten ditut

eta azkenik gaitzesten ditut  
ni bezalako gaitzesleen gaitzespen hipokritak

ekidin edo borrokatu daitezkeen gertaera  
tamalgarriak  
gure gaitzerizko epelarekin  
estaltzen ditugulako behin eta berriz

---

# HAIZEAREN PARTEA

Landare hostogalkor garella  
ari naiz frogatzen  
gogo askorik behartu gabe  
onartzen dudala haizearen partea:  
orbela adarrak abaildutako etxeak...

preso ari dira eramaten  
saldoka doaz gatibu nire lagunak  
ezagunak ezezagunak  
eta ziegetatik arin itzultzen direnei  
festa xumeak eskaintzen  
dizkio gertuko jendeak

esaten digute ereindako  
gorrotoa ari garella biltzen  
eta hasi besterik ez dela egin uztaroa  
baina bizitzen segitzeko  
ez da hainbeste behar  
eta inor daramatenean

Madril aldera begira jartzen naiz  
haizearen peskizan  
oroimen ederren biltegian

gauzen berezko logikari  
amore emanda egin dut  
lagun gabetze hau  
garai berrietara jartzeak dakartzan  
ordaindu beharreko bahia dela  
—akastasun lizundu hori—  
eta saiheska begiratzen diet  
auzotarrei batzuetan  
iragan-min aurreratu batez  
asmatu guran bezala  
hurrena nor gal litekeen  
askatasunaren bidean



---

# GORDETZEKOAK

Urteotan guztiotan bizi izan dugunaren  
testigantzak gordeko dira  
agiriak erregistroak oin oharrak  
inoiz atzokoa eta gaurkoa  
izan zirela jakin dadin eta  
egunok gu bezalako jendeak  
bizi izan zituela ikas dezan  
oraindik mamitu gabeko orainak

pauso txikian igarotzen genituen  
sasoi bateko laborri arteko geltokiak  
—nola Ezkaba nola Miranda nola Gürs—  
eta gerokoak...  
bazirela igande arratsak  
banketxeen bulegoen aurretik paseatzen  
ematen zituztenak  
diruaren demokrazia amets  
—nola lurra nola libertatea—  
baziren porrot egiten zuten maitasunak  
pertsona zangopilatuak  
hiltzen uzten ziren mintzoak

—nola harriak nola zuhaitzak—  
eta balek inoren lokiak zulatzen zituzten unean  
eta hebaindutako gorpuen aitzinean  
artean ia dena konpon zitekeela uste genuela

---

# PUNPAKA

Erditik aurrera irakurtzen hasitako  
liburu bat bezala ezagutu nahi zintuzket  
lehen erdiko orriak bilatu  
edo zeuk azaldu  
basa artean edo sasitzan aurkitu  
eta falta diren pasarteak asmatu  
edo beste aldaera batean esan

txango luzeak egin eta nire gogoan  
Mantxako mortuan barrena hegalaria dabilenean  
naizena baino gehiago naizen ilusioak hartzen nau  
zauri guztiak direla sendagarri  
ez dagoela osatu ez daitekeen testurik  
ez higa ez daitekeen harririk

autobidean aurreratzen gaituzten  
autoetako gidarien albokoak hainbat  
banaizelako ilusioak hartzen nau  
eta neuregan zaramatzadala iruditzen zait  
ilunabar garrantza hedakorrean  
eta une eterno batez itsu-itsuan sinesten dut

kartzelazainen papar iletsu likina gabe  
eta presoen bisita galaraziengatik ez balitz  
ezinezkoa litzatekeela munduan edertasuna

---

# ILEGALAK

Gabiltzan bideak harrapatu gaitu  
esaten genuen ekintzen gaitzesteak  
ez duela arazoan oinarria  
konpontzeko biderik jartzen  
baina ekintza eta gertaera batzuk  
beti gaitzetsi izan ditugu  
esaten genuen berez direla  
aldakor gauzak eta baduela horretan  
zerikusia haizeak abaguneak  
dena ez dela beti zurrun eta berdin  
eta kontrako erauntsia heldu zaigunean  
giro makurrak okerrera  
egin dezakeela ikasi dugu berriz

gabiltzan bideak harrapatu gaitu  
eta ematen du ez gabiltzala ez dela biderik  
gelditasun handi batean  
isilak jan behar gaituela  
gure arrazoiak defenditzen ez dakigula  
ez dakigula azaltzen zergatik garen  
garen bezain setatsu eta ilun

indartsuagoa dela taldearen deia  
geure bihotzaren doinu hilduratua baino  
eta pertsonak egindako legeek  
legez kanpo jarri gaituzte  
armada minorizatuen helburuekin  
bat egiten dugulako eta  
gehiengo diren horienekin ez

gabiltzan bideak harrapatu gaitu  
gabiltzan bidean dago askatasuna  
eta bide hori zikina da

---

# HURRE

**b**eti gertatu izan naiz jazoera larrien lekutik hurre  
ez nuen sekula pistolarik eskura bildu  
ez nuen egundo jomugarik zelatatu  
baina ez nenbilen handik urrun  
banekien orotariko biktimen faktoria ginela  
albo kaltetuak eta zuzenekoak

beti gertatu izan naiz jazoera larrien lekutik hurre  
ez nintzen inoren heriotzarekin poztu inoiz  
baina behin edo behin  
mendeku nahiak sehaskatu izan nau gozo  
zuritu izan ditut erdizka  
taktika okerrak estrategia makurren itzalean  
laster dena konponduko zelakoari  
ezinbestekotzat nuen borroka eta minaren  
hierarkia baten sakadei amore emanda...  
ez nuen inoiz torturarik nozitu eta  
bisitetatik soilik ezagutu nituen espetxeak  
poliziak ere ez ninduen esetsi  
nerabe nintzen goiz argitsu batean baino

beti gertatu izan naiz jazoera larrien lekutik hurre  
auzo herrietan agitu dira  
berrogei urtez gure historia urratu dutenak  
edo geure etxe ondoan  
baina asteka edo hilabeteka sailkatuta ere  
egun asko egiten dute berrogei urte artekoek  
eta ibili-ibilian ohitu egiten zara (gaizki)...  
beti hitz egin izan dut gertukoez  
nahiz askotan neuk nahi bezain aratz  
mintzatzeko entendimentu eta adore aski izan ez

orain badakit  
niretzat egin izan dira hainbeste hileta  
niri eskainiak ziren galdeketa suntsigarri haiek  
kontrol eta hilketa guztiak niri begira antolatu ziren  
eta nigan jarritako igurikapenei zaputz egin diedan  
arren

hor egon izan naiz beti  
indar handiko drama eta komedia txiki askotatik  
gertu bai

baina bertan-bertan ere ez  
neure historiaren zero gunean



---

# BAKEAREN SEME-ALABAK

Gerraren aurrietatik sortuak gara  
gosearen zirtziletatik gatoz  
gezurraren zutabeetan gora hazi ginen

dena egina zegoen ordurako  
eta azkenean ondo bizi eta  
laketu egin ginen:  
aurrien artean dirua zegoen  
zirtziletan bildu zizkiguten  
otzan izateko estakuru sailak  
zutabeetan gora egin eta  
ikus zitekeen zohargia  
hizkera bat erauzi eta  
fedearen harra txertatu ziguten  
eta arima hilak jarri agintearen mirabe  
lasta suekin biribilean

protesta egin genuen  
baina ez aski sendo  
eta ez aski gora

izugarriak gertatu ziren:  
handizkako abandonua  
harlangaitza garraio urdailean  
eta galduko ez bazen  
poza inoren begietatik  
gorde beharra  
eta berriro bakea erein genuen  
auzoen gerra ezti eta  
geure gezur mikatzen soroetan...  
idatzita baitzegoen  
azkenean batzuk ondo bizi  
eta denok laketu egingo ginela

---

# ORTZIAN IRAKURLE

Arboladipean etzanda  
hodei zuriak ikusten dira adar artean joaki:  
beste herriak daude jendea lanean  
kosta bazterrak sukaldeak  
eta bururatzen zait zuhaitz adarrok  
gerri bati lotuak daudela eta  
gerriok sustraiek josita dauzkatela lurrera  
bestela joango liratekeela airean gora hegalaria  
eta orduan txoriek besoak behar lituzketela  
eta hegazkinek gurpilen gainean ibili  
*statu quo* honi eskerrak ez balitz...

belar gainean etzanda  
hodeiak ikusten dira pasatzen eta  
burura datorkit beste garai batean bizi ote garen jada  
joan zen denbora batean dudala gogoia oraindik  
eta aldi berri honek zer dakarren ez dakit  
ez bada haize-uhin arinen gainean  
historiaren aro batetik bestera izurde urtetsu legez  
geu garamatzala egun beti berdinen bestondotik  
ihesi

---

# HERDOILA LODI

Erabaki politiko sendoak hartu ditut gaur:  
barre aire batean ibili naiz ibai bazterrean  
baitezpada xede bakoitzari bere urratsa esleitu  
beharrez

zuhaitzek hostoetan irakurriz ziharduten  
firfira jostari gisa ulertu dudan hizkuntza berrituan:  
eztarriARRANTATUA dute orrien arima hilduratuek

«fabrika hustua» zerbaiten izenburu begitandu zait  
bide ertzean hildako satorra  
ukitu ez ukitu egon naizenean:  
hain leuna behar du bakardade horren belusak...

maiz eskaintzen diet maitetasun handiagoa  
ortzi bikortsuaren itxura aldaketei  
etxeko zaharren memoriari baino:  
eta hori kapitalismoa da

gutun laburra utzi dut emakume baten begirasunean  
deserritar batek atoan egingo lituzkeen galderez:

besteren gorputzetan arren  
gureak dira gau-minak inoiz  
jaulkitzen dituen zinkurinak

hain hotza sumatuko du nik igurtzi ezean hitzen  
azala...

lau dobletan tolestuko dut egunkaria  
albiste larriak albiste xeheak  
amari lotarakoan esateko gero

uste dut gaur ere ez dugula  
elkarri agindu genion lurra merezi izan

---

# MURMURIO HALAKO BAT

*Jon Anzari*

1

Ez dakit non nagoen eta ez dakit banaizen  
desagertu egin naiz  
hilda egon naiteke  
edo historiaren amaraunean galduta agian  
desagertu egin naiz  
eta beste edozein bezala  
(baina beharbada urgentzia handiagoz)  
neure buruaren bilaketa lanetan murgilduta nabil  
  
arraroa egiten zait  
erietxetan kasernetan morgeko zerrendan  
neure izena irakurri nahia:  
banago eta banaiz  
baina guztizkoa ez banintz bezala

behin-behinean banaiz eta ez naiz  
bat-batean ez nago eta hurrena banago:  
prentsa ebakinetara desterratua  
geltokian segurtasun kamerei  
ezabatutako irudietan xerka  
lurpeko ozeano nabarren ikaran

inoizka jendearen begira igo nahi duen malko nagia  
naiz

badakit desagertu egin nautela esatea  
borondate bulkada markatuegia dena demokrazian  
baina gogoak azken aurreko ahalegina eskatzen dit  
noizbait izan naizela aldarrikatzeko  
inoren asmakeria buruberoa ez naizela esateko apal  
(besteren ahotik ikasi behar ote dut  
halako batean izan nintzela munduan)

ez nago eta banago  
banaiz eta ez naiz  
desagertu egin naizela uste dut  
baina seguru-seguru ere ez nago

luzaz desagertu bat izan naiz:  
duela aste gutxi arte  
ez nekien non nengoen  
ez nekien banintzen  
baina liluramenduak amaitu dira

ez dakit Toulousera iristerako  
hilda nengoen  
edo neuk asmatu pertsonaia baten bizitza  
ari naizen azkentzen

zer egiten da  
inork beretzat nahi ez dituen altxorrekin  
non utzi nori eman nora bota...  
gorputegian nago  
eguzkiak egunero epeltzen ditu hozkailuetako ateak  
baina ez desagertuen herioa urtzeko beste:  
gorputz ustelgabea oparitu didate  
eta ez dakit zer egin  
non utzi nori eman...  
inork behar al du hilotz izoztu bat



lorontzi baten gainean abandonatutako  
meteorito mailatua izan naiz  
zer egiten da alfonbra azpian  
betiko laga ezin den altxor batekin  
non eman behar dut  
nire humanitatearen berri  
zer daukat erakusteko  
frogatu beharra ote dut noizbait  
desagertua izandako hildakoa naizela orain

meteorito lotsati bat naiz  
eta astuna gertatzen zait  
desizozten jarritako altxorra izatea:  
jaki aurrekozinatu batek bezala  
begiratzea munduari

aurkitu egin naute azkenean  
eta atzekoz aurrera kontatutako  
bizitza baten jabe egin naiz:  
jatetxe bateko ataria bi bidaiaria txartel  
dirua arropak geltoki bat...  
orain badakit: hiltzen eduki naute  
heriotzan bera-bera egiten

hamaika egunez aurrena  
eta hamaika hilabetez gero...  
ezkutuko altxorra izan naiz izuen izartegian

inork nahi ez zuen altxor gordea naiz:  
ez nekien non nengoen  
ez nekien banintzen  
luzaz desagertu bat izan naiz  
baina amaitu dira liluramenduak...  
orain hiltzen eduki nautela esan nezake:  
hiltzen eduki naute  
hil naizen arte

**JENDEA OINEZ**

---

# POETAREN ESKUAK

**N**oren izenean mintzo da poeta  
noren izenean mintzo naiteke ni  
noren ahotsa da nire ahotik  
nire eskuetatik hegaka doana

sarri mintzatu izan naiz inoren izenean  
bideak mendiak herriak oro  
nire baitan kabituko balira legez  
denbora tarte batean  
beharginek maiteminduek jainkoek eta heroiek  
poeten mintzoa besterik ulertu ezin balute bezala

noren izenean mintzo naiteke  
norenak dira bata bestearen ondoan  
paratzen ari naizen hitzok  
noren ahotsa da nire ahotik  
hatz tartetik hegaka doana  
poeta izan behar al da  
munduak igorri seinale argi ozenei  
ezikusia egin eta entzungor eusteko:  
hainbeste dira moduak

hainbeste dira egunak  
ergela izateko

zergatik pasa behar izaten dira beti  
minutuen mugak txarrantxa hesi artean:  
agindu nizun elkarrekin egoteko hiztegi bat  
baina ez dut bete  
zure minak ematzeko promesa egin nizun  
eta beste bat naiz orain

nork lagunduko dit hitzoi lur ematen  
hasierako helburua zen  
urreginaren taxuz lantzea bakardadea  
doinu eder bat jartzea desertuko harriei  
kondenatuentzat ondo amaitzen ziren  
poemak sortu bulegoko ordutan  
eta gero argi guztiak piztea  
baina nork lagundu behar dio poetari  
hitzoi lur ematen  
lur ematea ereitea den edo ez jakin gabe  
etxekoek lagunek ofizioko kideek  
segurtasun agenteek laborariiek agian...

ni joango naiz baina

nork lagunduko dit hitzoi lur ematen  
lur ematea xuxen zer den jakin gabe  
noren ahotsa da nire ahotik  
noren ahotsa da nire eskuetatik hegaka doan hau  
noren izenean mintzo naiteke ni

---

# MAITE DUZUNA

Ez dakizunean maite duzuna herri bat den  
gizon bat  
emakumea  
edo ezinezko kantua  
malko bat sumatzen baduzu  
sumatzen duzu marrazo bat begi mintzetik behera  
edo bare nekatu bat hosto bila  
betiko ostentzeko kausa hobearen beharrik gabe

ez dakizunean maite duzuna kantu bat den  
emakume bat  
gizona  
edo ezinezko etxea  
eta aho gozo batean badabil marruskatutako ogia  
itsaspeko bat periskopiotik  
dorre aldika itoa bistatzen ari bada  
edo marru ozen bat zeure izatearen eguerdi  
hautsian

ez dakizunean maite duzuna gizon bat den  
emakume bat

kantua

edo ezinezko kalea

eta zeure tristura eztian batzarturik

txapliguek hatsarrea iragartzen duten

mende zoriontsu bat bada jenderik gabeko

unibertsoan

bare nekatu bat etsi gabe doalako hosto bila

ez dakizunean benetan maite duzuna zer den

benetan ezer maite duzun ez badakizu edo

dena maite duzula esan daitekeen unetik gertu

bazaude

gertaeren logika ezak lehertzen du zalantza oro

durduzamendu atzeman gaitzak datoz

eta pausoak beldurra poza inoren agenda lokabeen



---

DUKEKO LARRAINA  
AZKOITIAN  
(HILETA KANTA)

*Mertxe Agirrezabali*

igoko al gara berriro  
gure arbola adarrera  
igoko al gara gauza guztien neurria  
apalagoa zen garaira

gertaera larriak eta mendeak jazo dira:  
lurrera begira jarri ginelarik  
esku ahurretan irakurriz ikasi dugu  
urrunera eraman gaituzten bideen berri  
eta bideotan galdutakoak  
gorde nahi ditugu beti

igoko al gara berriro  
pauso nahasien beldurrik gabe

elkar maitatzeko moduko hosto artera  
igoko al gara

geure gorputzak sortu  
zelula matxinatuak oldartzen dira  
hain luze ondu maitasunean  
zauriak handizka irekiz  
zelula asaldatu mulkoek  
zelako errepublika hautsia osa lezaketen etsirik

igoko al gara berriro  
han bulta batez libre izango gara  
jendearen samin gorritik...  
igoko al gara

goldaketa aroa da:  
lehen ere bilduak gara erruz uzta gozorik  
larrain bat egingo dugu  
bizitakoaren errautsekin  
abaro bildu eta babesak bakarrik denarentzat  
falta ez dakion inori elkartasun amets bat

igoko al gara berriro  
gure arbola adarrera

sobera goratu gabe itxaropena  
elkarren ondoan izateko poza jo arte doiki

igoko al gara berriro  
gure arbola ederrera  
igoko al gara berriro  
nahi dugunean jaisteko  
ahal dugunean jaisteko  
igoko al gara lurrera berriz

igoko al gara berriro  
igoko al gara  
larraina egingo dugu  
bizitakoaren errautsekin

---

# GU EZ GAUDEN LEKUETAN

*Xabier Baztarrikari*

Gu ez gauden lekuetan jendea dago  
eta beste leku batzuetan aurrera egiteko kemena  
dago

mendeek ernetako ordenaren itzala  
eta jendetasuna zakarretara botatzeko gogoia

harrotu egiten dira irritsak gu ez gauden lekuetan  
eta horregatik egongo dira  
beharbada gu ez gauden lekuak  
inon existituko ez balira bezala  
inoizko urkatuen zamapean abailtzen diren  
zuhaitzak...

eta mirari bat da eman zenidan azken besarkada

gu ez gauden lekuetan metatzen dira  
munduko arropa maiztua

hamaika zauriren ametsak mendekuak  
eta ezinaren urrezko akuariumak

gu ez gauden lekuetan gu ez gaude  
baina maiz bagauden itxura egiten dugu  
eta urrundu egiten gara gabiltzan lekutik  
inon ez egotea posible balitz bezala  
—bi punturen arteko distantzia luzeena gezurra da—  
eta idiotak bezala begiratzen dugu  
inor islatzen ez duten ispiluetan

gu ez gauden lekuetan gu ez gaude  
eta inon ez bageunde bezala bizi izaten gara  
batzuetan

ikusezin izateko ahalegin zoroan  
gu ez gauden lekuetan amaitu egiten da lurra  
jendea trumilka amiltzen da ortzira  
norbaiten gogoan gure etxeko sukaldea ageri da  
eta han beti bakarturik aurreikusten zaitut  
bost hamar hogeit hamar urte barru

ez dakit zergatik dauden gu ez gauden lekuak  
ez dakit zergatik ezin dugun egon leku guztietan...  
eta galderen hosto artean gerizatzen naiz

hemen jarraitzearren:

hainbeste dira defendi ezinak zaizkigun lekuak  
eta hala ere gu ez gauden lekuetan jendea dago  
zein bere izateko erari nolabait eusten

—bi lekuren arteko distantzia handiena gezurra da—  
eta gu ez gauden lekuetan jendea bizi da

---

# OSTENDUON MINTZOA

*Joxean Lasa eta Joxi Zabalarari*

Zenbat orduz zenbat egunez  
ostendu ginen  
noizko ezkualariak gara  
gaur hemen agertu garenak  
noizko desagertuak dira  
bila gabiltzanak...  
zein erbik zein eper izutuk  
ekarri ditu honaino  
duela 29 urteko ehiztariaren pausoak:  
haizeak badu akordurik  
orduko ahotsak badira gaurkoen kide  
irratiz mintzo direnean...  
non geunden orduan baina  
non gaude hemen gaudenean  
inoiz izan al ginen han  
eta noiz gaude orain

ostendu ginenok  
ba al genekien nondik  
ba al genekien noiztik gordetzen ginen  
zer pentagrama osatzen dute  
esaten ausartzen ez garen horiek guztiek  
orduko haizeak  
gaur egungo hostoak zafratzen ditu itsas aurrean  
inork behar izan gintuenean ordea  
beti ez geneukan gerturik odola  
eta batzuetan kosta egiten zaigu orain  
kausa ederren alde hitza ateratzen  
ezin izaten dugu lotsa izpi bat gabe  
ogia besapean ekarri  
ahora eman behar zaigu edateko ura  
ez dakigu izapideak eta denbora ondo nola bete

urteotan guztiotan  
epeka ostendu izan garenok  
zerk jarriko gaitu orain herrira bidean  
nola aurkituko dugu etxeko sua  
zer txara artetan jaikitzen da dolu kantua...  
noizbait itxiko da heroien aldi hau  
jendea elkarren ondoan biziko gara  
eta arrapostu emango diogu



luze armairu zokoan utzitako arrazoi sailari:  
garena eta ez garena agerian jartzeko  
tenorea helduko zen agian  
daukaguna eta ez daukaguna  
erakusteko ordua  
bestela zerk jarriko gaitu herrira bidean  
non aurkituko dugu etxeko sua  
nola igarri zer txara artetan jaiki den dolu kantua

seguru asko desagertu dena izango da  
desagertu dela ez dakien bakarra  
seguru asko ezkutatu dena da  
aro bat amaitu dela jabetzen azkena...  
zein gerlatan desagertu ziren  
zein gelatan ostendu ginen gu

---

# PENDULOA

Eguzkia batzuetan zuhaitz urduria da  
betaurreko kristalari batzuetan  
jatorrizko hondarra loratzen zaio  
eta orduan sakon ikusten da iragana

bakea batzuetan tokiz aldatzen du haizeak  
eta argazkietatik kanpo amiltzen dira  
gizon-emakumeak —zerraldo ia beti—

batzuetan ezer askorik arriskatu gabe zeken  
maitasunaren esperoan jartzen bagara  
oso luze samarrak gertatzen dira gauak —egunak  
barne—

batzuetan triku baten baitan bilduta bizi gara  
batzuetan ahuspez besoak zabalik luze-luze  
batzuetan haurrak bezala jagoten ditugu injustiziak  
eta albotik pasatzen dira tristura eta trafikoa

eguzkia batzuetan izar erdipurdikoa da  
batzuetan jendea da eguzkia argitzen duena  
eta jendea ere batzuetan zuhaitz urduria da

---

# ACONTÉCENOS A MIÚDO

*A Manolo Soto*

**a**contéceme a miúdo na Galiza  
sinto tremer a terra baixo os pés  
coma se quixese preguntarme  
que fago lonxe da casa  
que é o que me leva alá  
se o meu corazón sabe dos seus sons  
dos seus limites das súas fronteiras

mesmo as veces sentinme  
lixeramente ameazado:  
o país polo que camiño ponme a proba  
podería expatriarme se non as supero  
i eu esfórzome...

aconteceme a miúdo na Galiza  
a superficie que piso é un espello  
e segundo vaime reflectindo  
móstrame as miñas carencias  
aquilo que debía ter dito e calei

aquilo que debía ter feito e non fixen  
os amigos perdidos e  
as persoas coas que non trabei amizade  
crecen árbores bravíos  
das raíces do meu choro  
e ofrezolle follas á xente  
da que torpemente namoreime

sucédenos a miúdo na Galiza  
somos poetas fora de tempada  
amigos doutro país...  
sucédenos a miúdo na Galiza  
sentimos a terra tremer baixo os pés  
coma se quixese inquirirnos  
que facemos na casa allea  
que é o que nos trae acá  
se o noso corazón acerta a latexar ben aquí  
e intentámolo...

sucédenos a miúdo na Galiza  
traemos un puñado de terra ou un canto rodado  
ao amigo defunto  
buscando rimas demasiado doadas  
para un mal poema:

terra hedra pedra...  
estendemos as mans  
querendo alcanzar algo fermoso  
que non sabemos que é  
e non chegamos a tempo  
somos poetas do outono vidos na primavera  
queremos chegar alá sen estar de todo aquí  
sucédenos a miúdo na Galiza  
é un estar sen estar  
é unha forma de ser sen chegar de todo a ser  
deixando como prenda amigos  
e unha inquietude fragmentada

---

# ANTIDOTOA

Munduko albisteen artean  
kapsula zigilatu batean nagoela begitantzen zait  
eta ez dakit xuxen  
zer beratzen ari naizen kafesnetan:  
opil belztuak  
lankide kaleratu berrien bisaia  
gorputzaren seinaleak aditzeko gorreria...  
goizarekin lerro-lerro datoz  
elkarren ondora bilduta estu  
etorbide jendetsuen aurre-sentipena  
lagun izandakoen arrangura ahantzia  
iruzurtien zuribideak

urteek harrizko egin naute:  
orain zurezko bihotza daukat  
lehortzen ari da ibai azaleko mintza  
nire soraiotasunak erreta  
eta astean bizpahiru egunez kalean zikintzea  
beste sendagairik ez dut kausitzen horren aurrean  
(sobera haserretu sobera jan sobera edan...)

eraiki gabe utzitako etxeetan bizi da egun  
utopia burges txikien hautsa  
tailer itxietan errabiatzen da nire arima arlotea:  
mundua sutan den bitartean  
epe finkoan ezarrita daukat bankuan  
xahutzen ausartu ez naizen maitetasuna  
eta nire aroko zenbait biktimak  
kafesne hondar artetik agurtzen naute:  
torturatuak dira presoak dira  
ihes egindakoak dira bahituak dira  
nahita edo deskuidoaz hildakoak...  
denek diote aho batez  
zein garrantzitsua den ondo gosaltzea



---

# MILITATU

Egunero ematen dut izena zure bihotzaren alde eta berehala datozkit etzanda behetik gora ikusitako arbolapeak hostoak hodeiekin dantzan eta gurea edo beste edozeinena izan maitasunagatik antolatu elkarretaratzeak auto karabanak giza kateak herri harresi eta banakako manifestazio erraldoietan parte hartzen ari naizela etortzen zait militantzia erabateko eta atzera ezinean

estrategia eraginkorragoak inguruabarrei begira taktikoki hobeak aztertu eta arakutzen ditut nonahi: aurreko eta ondoko belaunaldien artxiboan nazioarteko biltoki eta gorputzari itsatsi huntza artean

ekintza zuzena desobedientzia asmoak elkartasuna ordaintzen ditut ahal neurrian eta zure bihotzaren alde egunero jotzen dut neure burua errudun

hurrena ere etzandakoan behetik gora arbolapeak  
hostoak hodeiekin dantzan ikusten ditudanean  
edertasunaren pilpira zeri egotzi izan diezaiodan

---

# MAIATZ BERRITAN

Esan didate suge gorriak umetzeko  
sasoi betea dela hau  
ibai bazterrera jotzen dutela  
oskola urratuta kumeak jaio eta  
berriro mendira aldatzeko ondoren  
piztia jendearen ibilera irudikatzen dut  
ortzia mehatxuz enpo bidea zail...

ikusi dut hitzak mamitu egiten direla sarri  
esaten eta idazten direnean  
ez dela berdin zer non eta nola esan  
arraso muda daitekeela esanaren indarra  
mintzoaren hautua egiten denean...  
mende erdia daramat  
zer naizen galdetzen neure buruari

bart aspaldiko lagun batek  
sega mekanikoaz hatz batean irekia egin  
eta herri hau ongarritu zuen bere odolarekin

bart bi suge txiki kalitu nituen  
zabortegean gorpu agertu zen  
gizon gazteaz akordatzeke

bart ohiko bihurgune itsuan eman zuen  
beste bira bat munduak  
eta nik lasai so egin nien  
egin gabe bazter lagatako ekimenei  
hurrengo egunsentiaren saria  
beste ezeren nekerik gabe  
seguru irabazia banu bezala:

ez den hizkuntza batean mintzo  
ez den herri batean lo egin  
ez den maitasun baten ondoan jaiki

eta kapitalaren logikak  
erraz narama  
narabil

---

# ETA BIHAR

Zer egin behar dugu  
ohorearen lurralde galduarekin  
noiz gorpuztuko dugu  
agian inoiz inon ezagutuko ez den  
erresuma estrainio hori  
non mamituko da  
noren begietan zein bizkarren gainean

zer egin behar dugu  
xuxen zer den esaten asmatzen ez dugun  
jendearen duintasunarekin  
bizi izandakoenganako begirunearekin  
zelako doinua jarriko diogu  
mundu honen ardatz karranpatuari  
nola babestuko dugu jendearen sumina  
nola gordeko dugu itxaropena  
lizundu gabe

erne daitezen behartzen garenean  
nondik hurreratuko gatzazkio  
elkarren bakardadeari ordu egokian

barne muinak sobera urratu gabe  
gogo-bihotzak zapuztu gabe  
neurri doian

zer egin behar dugu inor ez ahazteko  
zer egin behar dugu bizitzaren edertasunarekin  
eta zer egingo dugu maitasunarekin  
garaipenaren biharamunean

---

# IRITSIKO DA EGUNA

Īritsi da gure gaurko eguna  
iritsi da gure gaurko aldia  
suerteko eta zorioneko gara  
eta orain laino mugan ikusi ahal den  
bide zabal hori pagatu duten guztiekin zordun gara:  
zubiak kaleak etxeak hor badaude  
sukaldeak arropak kantuak hor badira  
hango eta hemengo jende askok  
gure aurretik horretan jardun duelako da  
horregatik daukagu eskura  
hainbeste ondare eta hainbeste ardura  
hau da gure gaurko aldia  
hau da gure gaurko eguna  
eta lehen beste hainbatetan gertatu bezala  
berriz ekibokatzen bagara  
jendartearen seinaleak  
kafe hondarrak  
edo txorien hegaldiak  
gaizki irakurtzen baditugu  
agian azken aukera izango da

baina ez diogu beldurrik  
beste behin erratu eta porrot egiteari  
ezin baitugu  
asmatzeko aukerarik txikiena joaten utzi  
gaurko hau gure azken ekina gertatuko balitz ere  
ezin baitugu irabazteko aukerarik galdu

iritsi da gure gaurko eguna  
gure aldi da  
honaino ekarri gaituzten  
erabaki zuzen eta eskuzabalak ditugu begira  
egin ditugun makur eta injustiziak:  
hainbeste bazterketa bidegabe izan dira  
hainbeste hildakoak eta arima hautsiak...  
larri kolpatutako denbora batean bizi gara oraindik  
larri zauritutako denbora batean  
baina badakigu honek behar duela  
garai berri baten atalasea eta hastapena  
beharbada izango zen  
orain gauden honetara lehenago ailegatzeko era  
baina ez dugu jakin nola  
berandu ibili ginen  
eta ez genuen asmatu orduan



eta errakuntza eta aukera galdu horien guztien  
zama

bihotzean dakargula gatoz  
iraganak eta geroak oinordetzan  
laga diguten orain honekin:  
orain hau baino ez daukagu...  
eta azkena gerta badaiteke ere  
ez diogu beldurrik beste porrot bati  
izan ere hain dugu premia handia irabazteko  
norbaitek noizbait zerbait irabaz dezan hemen  
eta hain gertu dakusagu eskueran  
aro hobeago baten aukera  
elkar bana daitekeen aro baten aukera  
inork inor sekula zapalduko ez duena...  
egin diezaiogun gure gogoeta zintzoenaren promesa  
egin diezaiogun gure ahalegin kezkatuaren  
promesa  
aldi hau pagatu duten guztien ohoreari

aldiro bizi izan dugun egokiera  
izan da geneukan onena  
geneukan bakarra  
baina oraingo orain honek  
aurrekoen aldean geroaz beteago

orain artekoek baino orainago dirudi  
gure oraineko orainak gaur  
eta ez dugu ekin gabe igarotzen utziko  
hainbestekoa du herri honek irabazteko premia  
hain karu pagatu du mendeetan  
hain karu pagatzen da bizi garen munduetan...

iritsi da orain hau  
hau da gure aldia  
hauxe da gaur daukagun orain bakarra  
egin dezagun gure gogoeta zintzoenaren promesa  
egin dezagun gure ahalegin kezkatuenaren promesa  
ez daukagu hondarrekoz galtzeko beldurrik  
ez dugu irabazteko beldurrik  
hemen norbaitek noizbait zerbait irabaz dezan  
premia gorria baizik  
gaur da gaur guztietan gaurkoena  
orain da orain guztietan orainena  
iritsi da gure gaurko eguna  
iritsi da gure gaurko aldia  
eta hala ere adiskideok  
hala ere  
iritsiko da eguna!

**GOSARIA ETA LEGEA**

---

# GOSARI LEGEA

**K**afesne irakinetan sartutako erpurua  
miazkatzen ari naiz  
hainbeste urte gorputz honen  
gainazalean barrena zokomiran  
eta soinak beti du ezusteko atseginen bat:  
ez bada miatu gabeko erretena  
estreinakoz tinkatutako giharrak  
edo bulkaden itzalen bat sukalde bazterrean...

esploratzaile harrituarena jokutzen dut  
uste bako min sor batek beretzen nauenero  
hobi komuna osatu dut debaldeko tristurentzat...  
erabaki txikiek tarteka kontu larriez ebatzi ohi dute  
eta bizi izandako egun bakoitzak  
orbana uzten du barrenean

mundu honek zikindu egiten gaitu jendea poxi bat  
horretan du bikaintasuna:  
ebatondoaz eman tatuajeei taxua  
garrasiei sartu abesti doinuak  
eta su burdina egin erretako hatz mamia

bizirik nago

eta orain noiz arte jakitea baino

noraino jakiteak dit ardura:

beldur kuttun ezkutuetaraino

leiho pareraino

zukanaino...

hasieran nintzenetik

beste animalia bat ari naiz bihurtzen:

digestio modua

algaren eskala

malkoen zaporea...

urteen puruz txertatuak nekartzan gailuen

onurek miraturik naraukate:

zer dira gero haize hezetasunei eta presio aldaketei

horren doi antzemateko gai nire baitako

oi higrometro barometro eta anemometro jatorrok!

adinaren uhagaren gainean zaldizko noalarik

ohoratu nahi zaituztet goraki

esaten dute gaixoaldi gogor batetik osatzear den

azken aurreko herria garela European

baina kafesne irakinaren aldamenean

neurri-neurrian zahartzen ari naizen bitartean  
ez naiz ezeren biktima  
ezpada utzi ezin dudan zenbait ohitura okerrena  
eta nire buruzagitza poetikoa espetxean dago

---

# ARNASA KANTUZ

Esaten dute  
nahita ez dagoela arnasa hartzeari uzterik  
baina hori mito hutsa dela denok dakigu

hamaika tratatutan irakurri dugu  
ezin dela maitasuna kontrolatu  
ausaz jokatzeko duela  
esfinter erotu batek nola...  
petxuan trabatutako  
hezur gaiztoa da hori  
gezur gogor bat

entzunda nago  
klase arteko bakea posible dela  
eta beste munduetako mapak  
merke saltzen direla...  
hori sinesteko fedea behar da

oinak ibiltzeko direlako elezaharra  
espazioa aldi batez okupatzeko  
amarrua baino ez den juzkua eginda nago

eta inor larregi ez mintzearren  
denbora aipatu gabe diot hori  
erreparo larriz galdatzen baitut  
denbora ez den beste kontinente labain bat

gauza batzuk ikasi ditut atzo-gaurretan:  
oinak ez dira ibiltzeko  
—ba ote da hori ez zekienik—  
airea asmatzeko dago  
—inork egingo al du—  
eta musika soinua ahotsak argia  
ezinezko loaldietako sehaska kanta dira

oraindik plazer pribatua dirudi bakeak  
maitasunak beti narama  
autarkia ilusio eder batera...  
atzokoaren ondoren  
arnasa nahi dudalako  
nahi dudanean  
nahi dudanekin hartzen dudala uste dut...

bat-batean itotzeko aukera berriz  
zoragarria iruditzen zait



---

# ABESTEKOAK

Udazken hondarrean  
nork abestuko du orbelaren birundaz  
azala lehortu didan haizea  
ari delarik lanean gizateria osoarentzat

nork abestu behar dio errepide erreari  
bidean galdu ditugunei  
libreagoa den espazio batetik...  
garai bateko deiak jasotzen ditut  
konformismoaren posta kodeaz  
karta azalean

nork abestuko die gure mito erotikoei  
deblauki hil ziren nire ikasleek  
euren amildegitik  
euren auto lehertutik  
euren eskopetaren kanoitik  
ibaiko euren osin izoztutik  
euren zelula matxinatuetatik  
egiten didate agur  
deitorez natorkielako esku hutsik

nork abestu behar die ordu hilduratu nagiei  
nork memoria suntsituari  
nork akordu ezaren igali geza haiei  
nork inoiz izan ez bailitz  
irristatu den maitasunari  
nork historiako etxe hustuei  
nork abandonuari

udazken hondarrean  
nire eztarri galgarritik  
ez dakidan mintzoan  
neuk abestuko dut  
mintzoa ez dakidan lagun-ustel limurtu  
ez nagoen jende bati  
ez naukan aldi honi  
abestuko diot nik

---

# URTEMUGA

Gaur hamabost urte  
lurrean zuloa egin eta  
aita sartu genuen  
gero lurra berdindu eta  
harrezkero gainean bizi gara

ez ginen aurrenak izan  
ez gara bakarrak  
—seguru gauzak  
konpon zitezkeela  
beste modu batera  
baina ez genuen jakin nola—

milioika jende bizi da  
gure antzera  
larri maiz  
inoiz ezaxola edo pozik  
gurasoen hilobiaren gainean

denok maite dugu bakea  
eta edertasuna

—seguru gauzak  
konpon zitezkeela  
beste modu batera  
eta ez genuen jakin nola—

gaur hamabost urte  
lurrean zuloa egin eta  
aita sartu genuen  
baina ahaztu egin zitzaigun  
haren ondasunak lurperatzea

---

# LEHEN TAUPADAK

Uste dut euria ni etxetik atera zain dagoela  
hodei beltzetan gordea  
kanileko ur hotza edaten dut  
itsasoan egarriz ito direnen gorazarre apalean  
jaso dugun guztiarengatik esker zorrez  
miresten dut egunsenti hau  
eta ez eman behar zaigunaren promesa gisa:  
dirua zorionsua da  
hego haizea txistu joka ari da  
elizan gauez kutxa gotortuan gordetzen da  
jainkoaren irudia  
eta sasiak hartuko du noizbait ozeanoa  
  
dena ez da denbora eta espazioa ordea  
bada beste nonbait errenditzen den gauzen  
sentimendua  
aroen aldamenetik ibilian doana  
eta han agian bestek ordainduko dute  
gure abandonuaren bahia...  
euri tantak atezuan daude etxe inguruan  
teilatu hegaletatik nire gainera jauzi egiteko

ez dut inoiz ulertuko perfekzioa:  
hitz hanpatuak jaulkitzen ditut  
eta ez dakit noiz isildu...  
gaur bankuak itxita daude  
eta oraindik maite nauzula uste dut

---

# HAUTUA

**a**terpe herbala du jendeak munduan bere hitzak  
gabe

zelan adierazi behar du minen duena

zelan hostogabetuko egutegiak

eta zelan azaldu beste fase batera

egin nahi lukeela jauzi

joko arriskuz bete honetan...

eta inork badio geu izateko

geure hitzez beste egitea dela bidea

esango diot neuk nahi dudala

hautatu neure galbidea

ez naizela inoiz izango

maite ez dudan ortzi baten txori kantaria

eta behartuta ez bada

ez naizela biluztuko

neure gogoaren kontra inoren aurrean

euskaraz bizi nahi izaten dut batzuetan

ehuneko handi samar batean

badakit ni ez naizena ez hizkuntza bat

ez bandera bat ez herri bat:

ni bakarrean ezer gutxi den euskalduna naiz  
bakarrean ezer gutxi naizen euskalduna da ni  
ez guardasol bat adina  
ez errezeta bat besteko  
ez abesti baten erdia  
ehuneko handi samar batean  
euskaraz bizi naizen euskalduna naiz  
eta batzuetan zeharo harritzen nau  
euskaraz bizi nahi izateko aukera izateak

ez dut euskararik behar bizitzeko  
bizitzeko airea behar dut  
arnasa hartu hainbat bider minutuko  
bihotzak gorputzeko zokorik urrunenera  
odol neurri bat punpa diezadan behar dut  
eta gero beste hainbat osagarri:  
lagunartea elkartasuna sexua asti pixka bat...  
baina euskara ez dut den mendrenik ere behar  
bizi ahal izateko  
gosea eta egarria asetzea bai  
estalpea giro ez denean  
demaseko hotzari eta beroari aurre egitea...  
gero bestelako alderdiak ere badira  
nola diren jendetasun neurri doia



eta gauza ederren itxaropena  
baina euskara ez dut behar bizitzeko

mintzo naizen euskara  
idazten dudan euskara  
ametsak eragin eta inoiz loa galarazten didan hori  
hautu libre bat da niretzat  
bizitzea ez bezala...

bizi ahal izateko  
maitasuna gorrotoa eta lana  
agian beharko ditut noizbait  
baina euskararik ez dut inoiz beharko bizitzeko  
eta hain juxtu  
ehuneko hainbesteko batean  
bizi nahi dut euskaraz  
derrigorrik ez dudalako

bizi naiteke beste hizkuntza batean  
eta hala bizi naiz ehuneko esanguratsuan  
baina nik euskaraz bizi nahi dut  
portzentaje handiagoan hala nahi badut  
edo portzentaje txikiagoan gogoak ematen badit  
ez hobe izango naizelako hala  
ez inoren on-gaitzak osatuko direlako horrekin

baizik eta nazio puska txiki bat naizelako  
eta ni naizen nazio zatitxoa izateko  
ehuneko hainbesteko batean  
euskaraz bizi nahi dudala deliberatu dudalako  
horren derrigorrik ez dudalako naiz euskalduna ni

bakarrean ezer gutxi den euskalduna naiz  
bakarrean ezer gutxi naizen pertsona da ni  
eta hitzek beti naramate norbaitengana

---

# ALDERRAI

Ezin dut zure gorputzean sartu  
makurrik eragin gabe  
bakarraldiaren hozkiak jotzen duenean  
nire hatzen  
nire mihiaren  
nire ezpainen irismena mugatua da  
eta uneon ez naiz berba gura  
tramankulu otzanez makinez...

bi ezerez eternoren artean  
gertatu gara elkarren ondoan  
eta goizero mundua  
ez dela akitu ikustea  
zorion iturri apala da...

zatoz  
ondo baderitzozu  
atzean utzi duguna berritu eta  
elurrak teilatu gainak zuritu bitartean  
biok gorputzeko bazter isil batera  
emigratuko dugu

---

# BIZIAK ETA HILAK

Egunerokoan hildakoez  
asko arduratu ez arren  
hor dira beti  
gogoan baino ezin dituzu  
atxiki erabili atera  
ezin diezu konturik zorrotz eskatu  
eskerrak zuzen eman  
eta memorian gorde edo ez  
jaki erraza dira irensten  
gehiengo nasaiarentzat...  
egingo nuke  
ebakitako zuhaitzek  
hautsitako promesek  
desagertuek  
eragiten diotela nagi  
munduari bira

orain haien edertasun irritsak  
beste nonbait dira  
gozamenaren zentzuak  
ez du zertan bat etorri

zintzo edo makur jokatzearekin  
egitate ezeztatzen zaila da  
inoren heriotza  
eta hilak mulkotan aletzen hastea  
edo nahigabe bezala  
orenen orbanen eremuan  
sartzea aski da  
haien bake karroinduak  
asalda ditzan biziak

hala  
nahitaez  
hildako guztien ondoan maite dugu elkar  
ez dago pausoa ematerik  
ez arnasa hartzerik  
hilak  
haien kontzientzia jarauntsiak  
zotin edo usin batean gure jabe egin gabe

eta biziak bezala  
hilak ere ez dira berdintzen zelai isiletan:  
beti datozkit gogora maite ditudanak  
nor bere ateraldi eta keinuez  
eta luze-sakon gorroto nituenak ere bai...

badira hala ere  
bizi zirela aski maite izan ez  
eta bidezkoa ez den arren  
besteri oinordetzan  
utziko nizkiekeenak

hildako guztien ondoan maite zaitut:  
eta urteak eta hilak metatzen goazen eran  
ez dakit nola kabitzen garen hainbeste jende  
ohe bakarrean

---

# KONTRAERAN

Ezetz dioten arren baietzean nago  
ez da berdina maitasunak  
ilunabar izoztuetan edo  
gaugiro ederrarekin harrapatzea  
ezbeharrek ez dute berdin tratatzen  
jende ondo-bizia eta behartsua  
—soziologian aditua da zoritxarra—  
antzik ez dauka abandonuak  
bistrot bateko mahaian edo  
harrera kai galarazietako aduanan...  
nahiz bietan hezur gogorrekoa izan  
gaixotasunak berdin kolpatzen du  
erdalduna eta euskalduna  
baina badago aldea hitzetan

ezetzarekin bat egin behar banu ere baietz diot  
erdi aro ospel batera goazela pendizean behera  
nago daukadana galtzeko beldurrak eragin dardara  
eta soin adarren txindurritze hau  
ez dela erreparo psikiko somatizatua  
edo ideologia endekatu baten ondoriozko

kolesterol mailari dagokion marka baino...  
nire baiezkoarekin miraturik  
egoten natzaie labana ahoi so  
nola abesten dizkieten lo kantak  
hozkaileko oilasko papar zuhailei  
eta istiluen aurkako poliziei ume jaio arren  
koskortu arte ez zaiela antzematen  
euren klasekoen aurka ekiteko sortu zirela  
diost gogoak

ezetz burgoiari baiezko pikorrez jartzen natzaio  
bada bustitasun itsaskorra  
sabelpe gozoko biloetara bidean  
eta justiziaren tentazio molde bat  
zauri zornatuen galdaran...  
ekaitzen seme-alabok borroka ere egin dugunez  
inoiz

ondo pagatua nago  
merezi izan dute  
zelula matxinatuen lekukotzek  
merezi izan du  
fusilatzeen atariko goizak  
merezi izan du  
hainbeste larderiak —eskola estatua etxea...—



eta anaiak anaia leihotik  
behera bota nahi izan zuenekoak  
merezi izan du  
ondo pagatua nago  
beti delako uda betea  
inoren buruko hemisferioren batean

---

# BIZI NAIZEN HAU

**b**izi naizen hau  
bahituran hartu bai  
baina besteren gorputza  
balitz bezala tratatzen dut

adeitsu izaten saiatzen naiz  
jendetasunez hartzen dut  
eta ahal dudan neurrian  
eskatzen didana eman egiten diot

bizi naizen hau  
zure gorputza balitz bezala  
bizi naiz askotan  
jakinik gonbidatu jator baten arauz  
neure-neurea ere ez dela  
eta luze erakutsi didan pairamenagatik  
itsusten ari den arren maite dut

ni bizi naizen hau  
ez dakit noren gorputza den  
baina bertan egokitu naizenez

utzi zidanari edo hartu nionari  
eskerrak adierazi nahi dizkiot  
undina kantu limurkorrak gorabehera  
ez bainaiz oraindik zeharo jausi  
gogo huts izateko neure amarruetan

---

# HORIEK GUZTIEK

**E**ta nik bezala  
zer egiten dute ni horiek guztiek  
deblauki ortzi zolara jausten direnean  
nola moldatzen dira iturri agortuan  
arrazoiak bai baina erarik gabe  
gertatzen direnean  
nondik bilduko dute kemena  
ni horiek guztiek  
zu joaten bazatzaizkie

eta nik bezala  
zer egiten dute ni horiek guztiek  
leinu ilun baten abiaburu eta hatsarrea  
eurak direla jabetzen badira  
zelan egingo dute aurrera  
sortu ziren hizkuntza atzendu  
eta besterik ikasi ez badute  
zer egiten dute ni horiek guztiek  
oinek behera egin eta  
behe gainak eusten ez badie

eta nik bezala  
ni horiek guztiek zer egin behar dute  
mendeen mendetan  
sekula ez direla saldu  
ez dutela amore eman uste bazuten  
eta goitik behera tronpatu badira

eta nik bezala  
zer egingen dute ni horiek guztiek  
zu joaten bazatzaizkie...  
eta geratzen badira bakarrik  
kapitalarekin aurrez aurre  
(harridurazko senidetze zail batean  
elkarri begiratu agian)

---

# IBAI ONDOAN

---

astiro paseatzen naiz ibai ondoan  
baina gaur presaka antzean iratzarri  
eta ordu-orduan iritsi naiz neure soinera  
batzuetan iruditzen zait  
erosta ezkutuak gorde ezinik igarotzen dela  
ni bezalako jendea aldamenetik  
eta zoriona propio landutako  
ezjakintasun suerte bat dela  
kalera ateratzen naiz ohetik ihesi  
batzuetan ortzia belaun pareraino iristen da  
eta orduan etzanda baino ibiltzerik ez dago

astiro paseatzen naiz  
marxismoaren on-gaitzak zorrotz aztertzeke ezgai  
marxista uzkurtua hala ere...  
badira klase borrokak azal ez ditzakeen garaitzak  
psikoanalisiak giltzak ahaztuta lagatako ametsak  
batzuetan imajinatzen dut  
oporrak suizida desjabetuen etxeetan igarotzen  
ditugula

haienak zirela maindire zuriok ogia gazta zaharra  
ardo

eta izena asmatu ez zaion klub bateko kide naizela  
batzuetan ni bezalako jendearen  
ahoa estaltzen dut oihu bat isiltzeko:

bizkarka jarri eta atzeraka ibiliz geroaz oroitzen naiz

astiro paseatzen naiz ibai ondoan

zintzoen bakearen xerka

neu ez naizen oro arrotza zitzaidan sasoi haietan  
bezala:

ederra da bizitza baina hotzegi dago

ederra da bizitza baina oraindik hotzegi nago

---

# AZKEN BATEAN

azkena hel dakidanean  
nirea soilik izan dadin saiatuko naiz  
ez zor handirik  
ez larregizko albo kalterik  
leihoak zabalik doazela umore gaiztoak airean gora

mintzo garen herriaren azkena iristen bada  
gurea soilik izan dadin saiatuko gara  
ez erosta ez negar kanturik  
arrangurarik ez haboro arranguren izartegian  
eta zabal bedi zohargia bizirik diren hizkuntzetan

mundu honen azkena etortzen denean  
mundu honena soilik izan dadin saiatuko dira  
ez soberazko deitorerik  
ez demasezko etsipenik  
milioi urte batzuen isuria kanilean behera turrustan

utziko ditugu maite izan dugunaren markak  
materiaren akorduan  
eta hatsarreak azkena bilduko du agian



nola sagar ale batek nire eskuan itxaroten duen  
goizean  
ireki ahala berriak jaio daitezten egunkariko orrian

---

# LO AURREKO LURRUN

Pertsona oro legez ni ere  
bizi izan ez naizen munduen  
oroimenez mukuru nago  
eta gertatu aitzin aienatu instanteen  
bila nabil etengabe

baina izua diot  
luzaz inoren begietan kera egin  
eta holograma bihurtzeari  
oihanpe itzaltsuan aiduru  
eta zelatan izan daitekeenari  
krudeltasun errugabearen eskolan  
trebatu nahiko gaituzten kurloiei

ederra da  
ezagutu ez duzun argitasun baten miraz  
argiak amatatu eta loak uriolan eramatea  
esetsi guztien markaz atzenduta  
edozein leinu eta federen arrastoz futitzen zarela:  
zenbat milioi urte behar izan ditu planetak  
zure gaurko irri-iritziraino heltzeko  
(bost bat mila milioi igual)

zaharrak ikusten ditut  
belarria zoruaren kontra jarrita  
ez dabilen erloju bat atzemateko ikaraz  
eta berripaperak orrikatzean  
ez ditut ezagutzen han ageri diren soldaduak  
ez ditut ezagutzen hildakoak

eguna eta gaua nahi ditut ospatu  
dohaintzan hartutako sari dira:  
hemen amaitu da mundu txiki hau  
bihar abia liteke beste bat:  
ihesa antolatuta neukan neure baitara etortzeko  
baina berandu abiatu eta jende artean galdu naiz

---

# MASTER CLASS

Zertan oinarritu

geu gauzkan ordu honen emankorra

eta krudela egiaztatzeko

zeri heldu

minutuen isuri geraezina

haragijalea bada

eta ez badaki zer den gupida

eta ez badaki begiratzen atzera...

sentimenduen auzi mediku ez naiz

baina hutsik banago esan egin behar dut

nahi dut hitz egin asko galdu dutenez

tai gabe galdu eta galdu ari dinenez

eta nahi dut epai bideetan jarri

erabakiak zirela jabetu gabe

hartutako erabaki haiek

ardoaren erdokari so egindako hautu haiek:

badaukat zeri egotzi zorion une bakoitza

gertutik ezagutzen dut odolean txertatu zaidan  
lehen mailako bidazti txartela  
azalaren kolore definigaitz honen gailentasuna  
eta uhaza bere izariaz harro litekeen ber  
ergelki harrotzen nau neu besterik ezin izanak  
gauzak ausaz baletoz bezala lokartzen naiz gauero  
haizearen konpasean higitzen dira hodei gorriak  
eta eurekin ni

Managuaren askatzea ahaztu dut  
ahantzi zait Srebrenica eta 95eko uda  
Nestor Cerpa eta Japoniako enbaxada Liman...  
gizon egiten nauen ia dena ahantzi dut  
ez ditut ezagutzen duela hamar urtetik gora  
Marokotik etorri nire auzoak  
mugetako polizia bihotza ernetzen zait sarri  
ez dut ezer konprenitzen:  
maite genuen lagun hilaren txakurra  
paseatzeko txandak egiten nola gabiltzan  
nola biltzen garen sarri ispilu aurrera  
idolatrak lez irri bat lora dakigun esperoan

badaukat zeri egotzi zorion une bakoitza:  
nor ez da saiatu gauzen barrua ulertzen

hutsik banago esan egin behar dut  
maitatzeko ezinean banaiz esan egin nahi dut

gabiltzan kaleetan inporta duena galdua  
maiz jartzen naiz altzari izatera  
altzari humano neure antzekoen oldean  
beste inoren bizitzako  
pasarte hutsaletan leku bat hartu  
beste inoren bizitzako  
egun handien bezperan iraizean igaro  
itzalei gogor oratuta  
duela 2 milioi urteko hominido beldurtuaren  
hominido bortitzaren  
hominido iraun zalearen zainekoa naiz  
eta 4 milioi urte barruko akabuari begira jarririk  
nago  
denbora amaitzen ari zait  
baina ez nire leinukoei ez nire herrikoei ez giza  
jendeari

anabasa hau zuzentzeko  
belaunaldi biko tartea bada gutxienez  
txalo txikia egiten dut espanturik gabe  
gupidaz begiratzen diet nire esku ahurrei:

bide lanbrotsuak ikusten ari naiz eta  
haizea kulunkatzen duten izenak datoz sokan  
zerez eginak gauden esaten

---

# LAU MILIOI URTE BARRU

Lau milioi urte barrurako  
iragarri dute munduaren azkena  
zientzialari lagunek  
ordura arte erre ez den guztia  
kiskali egingo da  
hala galduko omen dira  
hainbeste gizalditako lorpenak:  
adiskidetasuna  
amodioa  
elkar hartzea  
gupida...

lehenagotik zerbait bai bageneki bezala  
gara galdu-gordean abiatuak  
akabu horri ihesi:  
presaka doaz haurrak gurasoen beso artera  
belozitateak limurtzen gaitu jendea  
beste planeta edo aro baterako txartela  
eskaintzen digula autoak gauak ardoak...



hurkoaren begietara so  
azken minutu hartako argazkiak  
ikusten nagoelakoa datorkit  
inon ez diren albumetan...  
ezin dugu lau milioi urte itxaron  
bizirik garenon poza  
galtzea eragozteko

lau milioi urte barru  
iragarri dute munduaren azkena  
atzo jakin nuen berria eta  
kezkak hartu nau:  
semeari telefonoa jo  
arropa lehorrak jaso eta  
bart lankide bat kaleratuko  
zutela gaztigua eman ondoren  
sobera haserretu ez izanak  
behea joarazi dit

ezin dugu lau milioi urte itxaron  
presa handia dago...  
atzo jakin nuen berria eta  
atzera kontaktetari  
dagoeneko jan diogu

egun bat:  
munduko gupida  
amodioa  
elkar hartzea  
adiskidetasuna...

hainbeste dira egitekoak eta  
lau milioi urteko epea hain labur  
bizirik garenon poz hau  
gaur bizitzeko  
lau milioi urte  
hain da denbora gutxi  
kapitala eraitsi eta  
bizi izan garenon poza  
galtzea eragozteko

---

# GOIZEKO TURISTA

Zortziak eta hogeiko hegazkinak  
arrasto harro arrosa dakar sartalderantz  
hodei maluta margulen kantoian aurrera  
txoriak eder irizten ez dio bere hegadari  
gauzen izena jakiteke idazten dut

tranpa zuloko gillotinan itota  
aurkitu dut lantokian sagu bat  
arbola soilduek otoitz dantzarian  
agurtu naute ahots baten eske  
gauzen izena jakin gabe idazten dut

gure umetan ere nostalgia banatzen ziguten  
ur ardoarekin orain bezalaxe  
irentsi egingo nuke ortzi hau balitz edangarri:  
begiak hantu garunak erre leher dakidala gibela

zer esanen dio bere herriak mende laurden  
preso eman duen bizilagun itzuli berriari:  
ausaz zeren kausaz jausi zen behiala  
urteen eiheraren tobera begitik behera

zer den sasoiz kanpo loratu beharra  
besteren lekuan besteren kontzientzia  
onaren soroetatik landa  
ausaz eskatuko zaio mugi dadila kontuz  
apurtu gabe etxeko kinkila

gauzen izena ez dakidalarik idazten dut  
gauzen muina ezagutu gabe  
makila lagun paseatzen nintzen lehen  
bideko zakurren beldur  
—haizea zakur  
uharri hondarrak zakur  
nire lau oinak zakur—  
makila eskuan nabil egun  
neure itzala gainera badatorkit defenditzeko  
harresiko harri batek besteari bezala  
begiratzen diot datorkeen denborari

goizero-goizero janzten dugu geure ama  
gertatzen ari direnen gaineratik azpitik alboetatik  
ageri den kresala apartsuarena jokatzuz  
nekizkien gauzen izenak  
ahazten ditudala idazten ari naiz eta  
zer ahazten dudan ahazteak arranguratzen nau

arrasto harro arrosa geratu da sartaldean  
begiak hantu garunak erre leher dakidala gibela...  
eta hemen ni  
egunaren karelaren gainean jarrita  
hankak dingilizka  
etorkizunaren zain nago